

Ontmoetingsdiens

Votum

Seën

Lofpsalm: Ps. 108: 1 & 4

1

Hoe rus, o God, my hart in my

nou 'k U 'n môrelied kan wy.

Ontwaak met my, my harp, ontwaak!

Ek wil die rooidag wakker maak.

U trou en goedertierenheid,

tot bo die hemel uitgebreid,

sal ek verhoog bo al wat leef

met sang wat van ontroering beef.

4

Wie bring my in 'n vaste stad?

Wie baan na Edoms land my pad?

U is 't wat ons nie by wou staan,

nie met ons leërs saam wil gaan!

Gee ons u bystand in die stryd,

want mensehulp is nietigheid.

Deur God sal ons tot kragdaad stap;

ons vyand sal Hy self vertrap.

Woorddiens

Gebed

Skriflesing: Handeling 2: 1-21 (83/92) & HK Sondag 12 v&a 32

### *Die uitstorting van die Heilige Gees*

**2** Toe die dag van die pinksterfees aanbreek, was hulle almal op een plek bymekaar.

<sup>2</sup>Skielik was daar 'n geluid uit die hemel soos van 'n geweldige stormwind, en dit het die hele vertrek gevul waar hulle gesit het. <sup>3</sup>Hulle het iets soos vuur gesien wat in tonge verdeel en op elkeen van hulle gekom het. <sup>4</sup>Almal is met die Heilige Gees vervul en hulle het in ander tale begin praat soos die Heilige Gees dit aan hulle gegee het om onder sy leiding te doen.

<sup>5</sup>Daar het godsdienstige Jode uit al die nasies onder die son in Jerusalem gewoon. <sup>6</sup>Toe die mense die geluid hoor, het 'n groot skare saamgedrom. En omdat elkeen gehoor het hoe daar in sy eie taal gepraat word, het hulle nie geweet hoe hulle dit het nie. <sup>7</sup>Verras en verbaas sê hulle toe: “Die mense wat daar praat, is tog almal Galileërs. <sup>8</sup>Hoe hoor elkeen van ons dan sy eie moedertaal? <sup>9</sup>Perse, Mediërs en Elamiete, sowel as die inwoners van Mesopotamië, Judea en Kappadosië, Pontus en die provinsie Asië, <sup>10</sup>Frigië en Pamfilië, Egipte en die dele van Libië om Sirene, mense uit Rome, <sup>11</sup>Jode sowel as heidene wat die Joodse geloof aangeneem het, Kretensers en Arabiere—ons hoor hulle in ons eie tale praat oor die groot dinge wat God gedoen het.”

<sup>12</sup>Hulle was almal verbaas en uit die veld geslaan. Party het vir mekaar gevra: “Wat kan dit tog beteken?”

<sup>13</sup>Maar party het gespot en gesê: “Hulle is dronk.”

*Petrus se toespraak op die pinksterdag*

<sup>14</sup>Toe staan Petrus saam met die elf ander apostels op en onder leiding van die Heilige Gees spreek hy die mense toe: “Jode en julle almal wat in Jerusalem woon, ek moet vir julle verduidelik wat gebeur het. Luister na wat ek gaan sê: <sup>15</sup>Hierdie mense is nie dronk soos julle dink nie, want dit is nog maar nege-uur in die môre. <sup>16</sup>Nee, hier gebeur wat God deur die profeet Joël gesê het:

<sup>17</sup>Só sal dit in die laaste dae wees,

sê God:

Ek sal my Gees uitstort

op alle mense:

julle seuns en julle dogters

sal as profete optree;

julle jongmense sal gesigte sien;

julle oumense sal drome droom.

<sup>18</sup>Ja, op my dienaars

en my dienaresses

sal Ek in daardie dae

my Gees uitstort,

en hulle sal as profete optree.

<sup>19</sup>Ek sal tekens bo in die lug

en wonders onder op die aarde gee:

bloed en vuur en rookwolke.

<sup>20</sup>Die son sal pikdonker word

en die maan bloedrooi

voordat die groot en glorieryke dag

van die Here kom.

<sup>21</sup>So sal dit dan wees:

elkeen wat die Naam van die Here

aanroep,

sal gered word.

**Vraag 32:** Waarom word jy 'n Christen genoem (a)?

**Antwoord:** Omdat ek deur die geloof 'n lid van Christus is (b) en daardeur deel aan sy salwing het (c) sodat ek sy Naam kan bely (d), myself as 'n lewende dankoffer aan Hom kan toewy (e) en in hierdie lewe met 'n vrye gewete teen die sonde en die duiwel kan stry (f) en hierna met Christus in ewigheid oor alle skepsels kan regeer (g).

Fokus: Handeling 2: 17-18 (33/53) & HK Sondag 12 v&a 32 (die Christen as profeteet)

<sup>17</sup>En in die laaste dae, spreek God, sal Ek van my Gees uitstort op alle vlees, en julle seuns en julle dogters sal profeteer, en julle jongelinge sal gesigte sien, en julle oumense sal drome droom.

<sup>18</sup>En ook op my diensknegte en diensmaagde sal Ek in dié dae van my Gees uitstort, en hulle sal profeteer.

**Vraag 32:** Waarom word jy 'n Christen genoem (a)?

**Antwoord:** Omdat ek deur die geloof 'n lid van Christus is (b) en daardeur deel aan sy salwing het (c) sodat ek sy Naam kan bely

Pinkster is die Nuwe-Testamentiese naam vir die Fees van die Weke, toe die koringoes gevier is deur 'n eendagfees waartydens spesiale offers aangebied is (Eksodus 23:16; Lev. 23: 15-21; Deut. 16: 9 -12). Net soos ander feeste geassosieer is met belangrike gebeurtenisse in die geskiedenis van Israel (bv. Paasfees met die uittoeg uit Egipte), het die fees ook in Judaïsme verband gehou met die hernuwing van die verbond met Noag en daarna met Moses (Jubilee 6); in die tweede-eeuse Judaïsme is Pinksterfees beskou as die dag toe die wet op Sinai gegee is.

Die Heilige Gees was voor Pinkster aktief en het in die skepping (Gen. 1: 1-2) gewerk, in die geskiedenis van die Ou Testament (Rigt. 6:34; 1 Sam. 16:13), en in die lewe en

bediening van Jesus (Lukas 1: 30–37; 4: 1, 14; Handeling 10:38). Maar daar sou nou twee veranderinge wees: die Gees sal in mense woon en nie net op hulle kom nie, en sy teenwoordigheid sou permanent wees, nie tydelik nie (Johannes 14: 16-17). Die Gees kon nie vroeër gekom het nie, want dit was noodsaaklik dat Jesus sou sterf, uit die dood opgewek sou word en na die hemel sou terugkeer voordat die Gees gegee kon word (Johannes 7: 37–39; 16: 7ff).

Wat gebeur het, moes gesien word as die vervulling van 'n profesie deur Joël, en hier het Petrus voortgegaan om die betrokke gedeelte, Joël 2: 28-32, aan te haal. Die eerste en hooftema van die profesie is dat God sy Gees op alle mense gaan uitstort, dit wil sê op alle soorte mense<sup>17</sup>, en nie net op die profete, konings en priesters nie, soos in die Ou Testamentiese tyd die geval was.

Alhoewel die tale in die Gees deur die skare verstaan is, het Petrus dit nie as 'n evangeliese instrument beskou nie, maar eerder as 'n teken wat verduidelik moes word (vgl. 1 Kor. 14: 22-23). Die aanhaling van Petrus van die profeet Joël kom uit Joël 2: 28–32. Die beskrywingsperiode is van die laaste dae (meervoud), beginnende met die uitstorting van die Gees (d.w.s. tydens Pinkster) en strek tot 'n onbepaalde tyd tot die dag van die Here (enkelvoud), wat ons die oordeelsdag kan noem.

Die profeet is gewoonlik 'n Bybelse verkondiger van 'n goddelike geïnspireerde boodskap, maar is in wese 'n verkondiger van die woord, nie 'n towenaar of waarsêer nie. 'n Profeet is om op te tree as mondstuk van God (in die OT). In die NT (hier in Handeling 2:17-18) het die Kerk die taak ontvang deur die Heilige Gees om op te tree

as God se mondstuk in 'n sondige wêreld, sodat mense kan hoor van Christus en sy Naam bely en gered word!

Hoekom word jy 'n Christen genoem? Want jy is 'n profeet van die Christus!

As profete moet ons aan 'n mensdom wat vanweë die sonde in nood verkeer, skaamteloos die enigste ware middel tot redding verskaf deur die evangelie van verlossing in en deur Jesus Christus aan hulle te verkondig. Christus het ons die opdrag gegee om *sy getuies te wees* (Hand. 1:8) en om *dissipels te maak van al die nasies* (Matt. 28:19). Ons moet ons *nooit skaam* vir die evangelie van Christus nie (Rom. 1:17).

Ons moet *oral* van Christus getuig: in ons huise, by ons werk, op die sportveld, in vergaderings, deur voorbeeld, woord, geskrif, ensovoorts - altyd en onder alle omstandighede.

As ons dit nie doen nie en mense gaan as gevolg van ons nalatigheid verlore, *sal God hulle bloed van ons hande eis* (Eseg. 3:16 21).

Dit is ons taak van *sending* en *evangelisasie*, *nie* net op georganiseerde wyse deur die kerk nie, maar ook op ongeorganiseerde wyse elke dag van ons lewe. Bybel- en lektuurverspreiding is ook noodsaaklik.

Om goeie profete te kan wees is dit noodsaaklik dat ons die Woord van God moet lees en bestudeer en na die prediking daarvan moet luister. Ons kan Christus immers alleen verkondig as ons Hom ken soos Hy Homself in sy Woord aan ons geopenbaar het.

As ons ons vir Christus skaam, sal Hy Hom vir ons skaam (Mark. 8:38). As ons Hom bely voor die mense, sal Hy ook ons name as verlostes by sy Vader in die hemel noem (Matt. 10:32).

Amen

Antwoorddiens

Gebed

Slotsang: Ps. 66: 1 & 7

1

Juig, aarde, juig met blye galme,

laat jubels opstyg uit die stof!

Sing tot Gods eer jul dankb're psalme,

en maak Hom heerlik in jul lof.

Sy grootheid ken geen maat of perke,

geen grens is daar vir sy gesag;

die vyand sien met skrik sy werke

en buig hom kruipend voor sy mag.

7

Kom luister toe, o Godgesinde!



Kom, almal wat die HERE vrees!

Ek sal vertel aan al sy vrinde

wat Hy gedoen het aan my gees.

Ek het geroep, God het geluister

toe alles nag was om my heen;

en voor die lig skyn deur die duister,

was God my lof, net Hy alleen.

Seën